



partii naleraq

UKA 2015/07-03

20.11.2015

2016-imut Aningaasanut inatsisissatut siunnersuut.

Aningaasanut inatsisissatut siunnersuutip siullermeerneqarnerani aappassanneerneqarneranilu Partii Naleqqamiit oqaaseqaativut innersuussutigalugit suliap pingajussaanneerneqarnerani imannak oqaaseqarfigissuarput.

Soorlu suliap aappassanneerneqarnerani Partii Naleqqamiit oqaatigigipput, assut iluarisimaaratsigu, nioqutissat ilaannut aammalu ikummatissanut naalakkersuisut akitsuusiiniarneringaluat tunuartinneqarmat.

Tassami Partii Naleqqamiit taakkununnga annertuumik akerliusimavugut, nalunnginnatsigu, naalakkersuisut siunnersuutaat piviusunngortinneqaraluarpat, tamanna aalisartunut, inuussutissarsiortunullu allannut, minnerunngitsumillu inuiaqatigiinnit pissakkinnerusunut ajorluinnartumik sunniuteqartussaasoq, taamaammat partiit akerliunitsinnut isumaqataallutik, siunnersuutinik taakkuninnga tunuartsiniaqataasimasut tamaasa Partii Naleqqamiit qutsavigeqqippavut.

Partii Naleqqamiit aamma iluaraarput 2016-imi raajartassat qaffanneqarmata, tassami Partii Naleqqamiit ukiorli aamma 2015-imut aningaasanut inatsisip suliarineqarneranut atatillugu taakku qaffaavigineqarnissaa siunnersuutigereernikuungatsigu, kisianni aamma suli Partii Naleqqamiit isumaqarpugut raajartassat peqassuseq ulorianartorsiortinngikkaluarlugu 90.000 tonsinut qaffanneqarsinnaalluarluartut.

Suliap pingajussaanneerneqarnerani raajartassat qaffanneqarnissaannik siunnersuut Partii Naleqqamiit akuersilluta taaseqataaffigissuarput, soorunami aamma isumaqatigisavut allat akuersarluta taaseqataajumaarpugut, kisianni soorunami akuerinngisavut akerliulluta taasiffigiumaarpavut.

Soorlu suliap siullermeerneqarnerani aamma aappassaanerneqarnerani Partii Naleqqamiit, naalakkersuisut aqqissuusseqqinniarnermi innuttaasut pissakinnerit siulliullugit aallerfiginiarmatigit, aamma sinerissamut qanittumi aalisartuniit akitsuusiiniarnerat akuersaarsinnaangilluinnaratsigit, matumuuna Partii Naleqqamiit erseqqissaqqipparput.

Tassami Partii Naleqqamiit suli isumaqarpugut, aningaasarpassuit nunatsinniit ukiut tamarluinnaasa aniatinneqartut, sullissinernut assigiingitsunut tunngasut, sipaarfigineqarnissaat pimoorullugit ujjartuiffigineqartariaqartut, innuttaasut pissakinnerit kaarfii imaqqangereersut “putooqqinniaannarnagit”.

Tassami suli Partii Naleqqamiit aaliangiusimavarput, minnerpaamik sillimmasiisarnernut aamma nunatta avataaniit siunnersortinik atuinernut aningaasarparujussuit atorneqartartut ilaasa sipaarfigineqarsinnaanerata pimoorunnerusariaqartoq.

Tassami Namminersorlutik Oqartussani sillimmasiisarnernut tunngasut pillugit paasitinneqarnerunissatsinnut atatillugu apeqquteqaaterput kingulleq naalakkersuisuniit ulloq 13. November 2015 akineqarmat, paasisatta ilagaat Namminersorlutik Oqartussani, suliffeqarfiit ilaannai ilanngullugit 2005-imiit 2014-imut katillugit kr. 363.631.105 mio sillimmasiinernut assigiinngitsunut akiliutigineqarsimapput, taakkunanngalu kr. 198.141.477 mio taarsiiffigineqarnikkut utertinneqarsimasut, tassa naatsumik oqaatigalugu ukiuni qulini kr. 165 mio missai, nunatsinniit, nunatta avataanut annerusumik iluaqutiginaq annisiinnarsimagivut.

Soorlu aamma siusinnerusukku oqaatigereeripput, 2014-imi siunnersortinut avataaneersunut 162,7 mio kr.-init nunatta karsianiit aningaasartuuteqarfigineqarsimasut. Taakku sunorpiaq atorneqarsimaneri aamma qanoq pisariaqartigineri pillugit naalakkersuisunut qanittukku apeqquteqaqqinnitsigit paasivarput, aningaasat taakkununnga atorneqarsimasut katillugit 23 mio kr.-init missai naalakkersuisuniit nassuiaatissaqartinneqartut, taamaammat tassani aamma takusinnaavarput aningaasarpassuit tassuuna aamma aaneqarluarsinnaangaluartut.

Taamaammat allaffissornermut attuumassuteqartunik suli annerusumik sipaartoqarsinnaanera Partii Naleqqamiit takorloorsinnaavarput.

Aamma Namminersorlutik Oqartussani suliffeqarfiutitta, nakkutigineqarnerulernerisigit, minnerunngitsumillu piumasaqarfiginerulernerisigit, suliffissat amerlanerusut maani nunatsinni pilersinneqarsinnaasut Partii Naleqqamiit suliap aappassaanerneqarnerani oqaatingaarput.

Tassami qanittukkut Naalackersuisuniit aamma paasivarput Royal Arctic Line Aalborg-imi katillugit 177-inik sulisoqartoq, tamarmik danmark-imut akileraartartunik.

Royal Greenland A/S katillugit 1.906-isut, taakkunannga 979-it nunatsinni sulipput, nunani allani katillugit 927-it Royal Greenland-ip sulisoringai paasitinneqarpugut.

Taamaamat-una Partii Naleqqamiit tamakku iluarsartuunnissaat siulliullugit aaqqissuusseqqinnermik taallugu sulissutigeqqaarneqartariaqartut isumaqartugut, innuttaasut siulliullugit aallerfiginiarsariinnarnagit.

Aningaasaqarnermut ataatsimiititaliap isumaliutissiissutaani atuarneqarsinnaasut ilagaat, Naalackersuisut ataatsimiititaliamut apeqqutit akissuteqarfigineqartarnerinut tunngatillugu imannak isornartorsiorneqarput:

“Naalackersuisut akissutaasa kalaallisuunngortinneri pisut ilaanni kingusissukkut nassiunneqartarnerat imaluunniit nassiutinningsuinnarneqartarnerat assut ajornartorsiutitaqartut ataatsimiititalimait isigineqarpoq. Taamaattoqarnerata ataatsimiititaliami sulinerup ingerlanniarnanut assut ajornakusoortitsivoq. Pisortatigoortumik oqaatsinik Naalackersuisut pimoorussinnginnerisa akuersaarneqarsinnaannginnera ataatsimiititaliamit Naalackersuisunut erseqqissaatigissavaa”.

Akileraartarnermut Akileraartarnermullu Ataatsimiititaliap isumaliutissiissummini aamma kiammik sinneruttumik nukissuteqarfinniit maangaannartitsisarnerup pinngitsoortitsisoqartariaqarneranit oqaaseqaateqarnerat Partii Naleqqamiit iluaraarput, soorunami naatsorsuutigilluinnarparput Naalackersuisut tamatumunnga pimoorussinerussasut.

Knud Rasmussenip højskolianut tunngatillugu periarfissaq kingullerpaaq atorlugu aaqqiisoqarnissaata Partii Naleqqamiit qulakkeerneqarnissaata piviusunngortinneqarnissaa Naalackersuisunut maanna akeqqvarput, tassami taamaaliortoqanngippat højskole-p Mærsk aamma Augustinusip aningaasaateqarfianiit katillugit 7 mio kr-init neriorsuutigineqarsimasut annaaneqarsinnaanerat assut uggornassamat.

Kommunit sanaartugassanut ukumut tulliuuttumut pilersaarutaat, ukiut tamaasa martsii qaammat Namminersorlutik Oqartussanut nassiunneqartartut qiviraanni, tassani takuneqarsinnaavoq, Qaasuitsup kommunia aamma kommune Kujalleq sanaartornerup tungatigut, Sermersuup

kommunianut aamma Qeqqata kommunianut sanilliullugit 100 mio-nilikkaanik appasinnerusunik pilersaaruteqartut.

Pissutsit taamaanerisa uppersarsiinnarpaat kommune Kujalliup aamma Qaasuitsup kommuniata aningaasaqarnikkut qanoq ilungersunartigisumik inissisimaneri.

Taamaamat sanaartorneq eqqarsaatigalugu kommune Kujalleq aamma Qaasuitsup kommunia immikkut isiginiarneqartariaqartut Partii Naleqqamiit kaammattuutingaarput.

Taamaattumik Qaasuitsup kommuniata aamma kommune Kujalliup sanaartornikkut, Qeqqata kommuniani, kommuneqarfik Sermersuumilu sanaartornikkut nalingiinnerusumik ingerlalnissaa naalackersuinikkut qulakkeerneqartariaqartut Partii Naleqqamiit isumaqarpungut.

Naggataatigut Partii Naleqqamiit soorunami inuiaqatigiinni ajunngitsumik ingerlalluortorpassuit tulluusimaarutingaangut tapersorsorlugillu, minnerunngitsumik inuusuttorpassuit ilinniarluarsimasut amerliartornerat aamma meeqqat inuusuttullu akissarsiassaq eqqarsaatiginngikkaluarlugu timersoqatigiiffinni peqatigiiffippassuarnilu sullissilluartut qutsavingaagut tapersorsorlugillu, kisianni aamma puujussanngilagut inuiaqatigiinni pissakinnerit sanngiinnerillu, ilaatigut inigisaminniit anisitaasimasorpassuit, anisitaqqajaasullu, meerarpassuit paarinerlunneqartut, ilaatigullu kinguaassiuutitigut atornerlunneqarsimasut ikiortariaqaratsigit.

Kisianni aamma taama oqareerluta angajoqqaajusugut akisussaassuseqarnerup pisussaaffeqarnittalu pimoorunneqarnissaa tamatta eqqaamasariaqaratsigu.

Taama suliap pingajussaanneerneqarnera Partii Naleqqamiit oqaaseqarfingaarpud.